

**SESSIONI URDINARIA DI U 16 DI NUVEMBRE DI U 2022**

**N° 2022 /M3/37**

**QUISTIONI URALI DIPUSITATA DA LERIA MARIA MUSSO**

**PÀ U GRUPPU « AVVENE GHJUSTU È RESILITENTE », À L'ATTINZIONE DI U PRESIDENTE DI L'OEC**

**Ughjettu : Gestione pubblica di i scarti**

Caru cunsiglieru esecutivu,

A situazione in quantu à e rumenzule in Corsica hè pessima, pessima assai. A sapemu tutti.

Hè capita chì a gestione è a riciclaggiu di e rumenzule sò una sfida pà noi tutti, cusì primurosi di u nostru ambiente. A pruduzione di scarti hè in crescita in Corsica : 243 933 tunnilate pà u 2021, sigondu à u rapportu di l'Odem di ghjughnu, vale à dì 721 chilò/abitante. 62% di sta massa hè sippilita, sia 151 000 tunnilate.

U costu di a raccolta è di i trasporti, ancu ellu, hè assai più impurtante in Corsica : 400€ pà una tunnilata, ciò chì raprisenta 183€/abitante, colpa, pà parte, à una debbulezza di u sistema di trascelta, è pà parte, à una gestione privata di i scarti. Sta situazione vene da a delegazione di a cumpitenza di trattamentu di e rumenzule da a maiò parte di l'intercummunalità (EPCI) à u SYVADEC, chì invece d'assicurà a gestione pubblica di e rumenzule da par ellu, dà a so cumpitenza à sucietà private, pagate cù soldi pubblici. A Corte di i Conti è l'Auturità di a Cuncurrenza parlanu, in quantu à u trattamentu è à i trasporti, du situazione di monopolu è d'opacità.

Dapoi u 26 di farraghju di u 2021, , l'Assemblea di Corsica hà dichjaratu chì a gestione di i scarti avia da esse pubblica. D'ottobre scorsu, una convenzione trà l'Uffiziu di l'Ambiente, l'intercummunalità, l'ADEME è u Syvadec hè stata prisintata. Si parla di l'apertura, cù l'accunsentu di u prifettu, di quattru à cinque centri, chì pudaranu trattà trà 2000 à 3000 tunnilate. Femu chì no n'aprimu 5, par 3000 tunnilate : currisponde à 15 000 tunnilate gestite da l'EPCI. Ogni annu, l'aghju detta prima, 150 000 tunnilate di rumenzule sò trattati da i centri. Frà queste, 15 tunnilate saranu trattate da e cumunità di e cumune : quale hà da gestisce e 135 000 chì fermanu ?

S'elle sò imprese private, hè capita chì intaressi particolari ponu piglià a suprana nant' à l'intaressu cullittivu è u bè cumunu, cù un costu tremendu pà a sucietà corsa.

U nostru gruppu hà una dumanda sola: cumu s'hà da fà a gestione pubblica di e rumenzule, induva è da quale ?